




GERMANIA



De Germania clarissima natione & dulcissima patria nostra, multa hic occurrerent scribenda, sed loci angustia cogit nos abbreviare sermonem. Hæc itaq; in superiore & inferiore, mediante fluuio Mogono, diuiditur. Inferior habet hac nostra ætate Brabâtiâ, Hollandiâ, Hassiam, Vuestphaliâ, Saxoniam, Frisiâ, Pomeraniâ, Prussiâ, Thuringiam, Misniâ &c. Superior uero habet Alsatiâ, Heluetiâ, Sueuiâ, Franconiâ, Bauariâ, Austriâ, Stiriâ &c. Inferior eo tempore quo Roma floruit, cultior fuit superiori. Nam scribit Tacitus, Germaniam olim fuisse horridam syluis & paludibus infœcundam, frugiferarumq; arborû & omnis culturę impatientem, id quod nõ de tota Germania, sed de ea quam Rhenus & Danubius includunt, dixisse accipiendum est. Obducebatur enim tunc ferè tota Sueuiâ, inferior Bauaria & Franconiâ, Hercynia sylua. Nunc uero tota colitur, adeo ut Hercynię syluę nullę reliquię supersint, præterquã in locis môtosis, ut est in Nigra sylua, in Ottonica, Speshartica & Bohemica sylua. Sed nec loca illa, quã tumlibet horrendam præ se ferant faciem, carent habitatoribus, ciuitatibus, arcibus, monasterijs & uillis, præsertim cum ex cõuallibus insignes undiq; amnes procurrant, & cuncti in Rhenum & Danubium ruant, & mirum in modum per eos populus unus alteri ferat opem, adducatq; ea quę apud se abundant & alibi desiderantur, qualia sunt, ligna ædificijs apta, metalla, picearum arborum liquor, casei, butyrû &c. quę ex montosis locis in magna copia in terram planam euehuntur, & pro eis frumentum & uinum reportantur. Quã celebres urbes intra quadringentos annos in superiori & antiqua Germania exorta sint, nemo est qui id ignorat, nisi qui nõ uidit Nurnbergam, Ulmam, Herbipolim, Bambergam, Vratislauriam, Ambergam, Norlingam, Heltprunnam, Heidelbergam, Stuckgardiam, Thubingam, Friburgum, & alia penè infinita oppida, quę intra Rhenum & Danubium post translatum in Germanos imperium sunt extructa. Dicitur nequit, quantum ista superior Germania in oppidis, castellis & uicis, arcibus, monasterijs & pagis creuerit post memoratũ tempus, ut uix satis loci fuerit tot Ducibus, Lantgrauis, Margrauis seu Marchionibus, Burggrauis, Palatinis comitibus, Comitibus, Liberis, Baronibus, Nobilibus, Episcopis, Abbatibus & Præpositis, in quos tota Germania, exceptis imperialibus ciuitatibus, quę Imperatorem dominum agnoscunt, est distributa. Multi plebei sub exactoribus istis duram seruiunt seruitutem. Porro mores & uestitus Germanorum, tam præfectorum quã subditorum indies mutantur, sanguinarijs militibus semper aliquid noui ex bellis afferentibus. Hinc enim increbuit & incruduit, potandi, iurandi, lacerandi uestes, occidendi & ludendi pessima consuetudo. De Sueuis, Bauaris, Franconibus, Alsatis & Rhenensibus, suis quibusq; dicitur locis.